

Iloqarfinni nunaqarfinnilu, immap tinittarnera ulerujussuarterneralu pillugit, angallatinut umiarsuarnullu talittarfiit qarsunneqartaleriartuinnarneri, isumannaannerusumik aaqqissuunneqarnissaat siunertaralugu, UKA2022-mut naammassereersimasussamik Naalakkersuisut pilersaarusoqqullugit peqquneqarnissaannik Inatsisartut aalajangiiffigisassaattut siunnersuut.

(Medlem af Inatsisartut Siverth K. Heilmann, Atassut)

Saqqummiussissut/Akissuteqaat

(Ineqarnermut Attaveqaasersuutinullu Naalakkersuisoq)

Aappassaaneerneqarnera

Naalakkersuisut sinnerlugit aallarniutigalugu Inatsisartunut ilaasortaq Siverth K. Heilmann taamanikkut siunnersuutip matuma siunnersuutigineranut qutsavigaara. Tulliullugu Sanaartornermut Ataatsimiititaliaq aalajangiiffigisassatut siunnersuut peqqissaartumik suliarimmagu, qutsavigaara.

Talittarfeqarfiit imaatigut angalanermi pinngitsoorneqarsinnaanngitsut ilagaat, taamaattumillu ataatsimiititaliami amerlanerussuteqartut allannguutissatut siunnersuut tapersermassuk, Naalakkersuisut nuannaarutigaat.

Talittarfeqarfiit allanngortiterneqarnissaat ukkatarineqarnerulissasoq, taamaalillutik talittarfeqarfiit pinngortitap nukiinut akiuussinnaanerulissallutik, siunnersuutip imaraa. Ataatsimiititaliap oqaatigaa allannguutissatut siunnersuutip matuma akuerineqarnera imaluunniit akuerineqannginnera apeqqutaatinnagu, nunatsinni talittarfeqarfiit sannaannik allanngortiterinissamut pisariaqartitsineq kiisalu tassunga atasumik aningaasalersuinissamut periarfissat qulaajarneqartariaqaraluartut. Tamanna Naalakkersuisut isumaqatigaat. Aningaasat nunatsinni umiarsualivinni iluarsaassinernik suliaqarnermut aningaasanut inatsimmi ukiumoortumik immikkoortinneqartartut aammalu aningaasat naammannngitsutut isigineqartut, ataatsimiititaliap isummerfigisimmamagu Naalakkersuisut taamatuttaaq annertuumik pingaartippaat. Oqaloqatigiinnerit taakkua piffissami aggersumi qilanaaraakka.

Naalakkersuisut siunnersuuteqartup eqqumaffigeqqusai malillugit ajornartorsiut ukkatarerusuppaat, aammalu pinngortitap allanngupallattarsinnaanera qanoq sillimaffigineqarsinnaanersoq aammalu nalinginnaasumik nunatsinni umiarsualiviit atorineqarnerisa isumannaatsunngortinneqarsinnaanerat siunissami talittarfeqarfinnut iluarsaassinissamut pilersaarutini annertunerulernissaat Naalakkersuisut peqataaffigerusuppaat.

Pingaartumik siunnersuummi politikerit tungaanniit umiarsualiveqarfiit ukkatarineqarnerulernissaat oqariartuutigigatsigu nuannaarutigaaara.

Naalackersuisut taamatut oqaaseqarlutik allannguutissatut siunnersuut akuerineqassasoq inassutigaat.